

ARLeF: La Vierte dal furlan in Rai

Ae fin di Març a tachin doi gnûfs programs di cualitât, par furlan, sul canâl televisîf e radiofonic regionâl

Tacant dai 31 di Març, il palinsest de **Rai Fvg** si inricjîs di doi gnûfs programs di cualitât **in lenghe furlane**. Di fat, **sul canâl televisîf** regionâl e larà in onde la tierce serie dal **documentari Int/Art** - fat di **Agherose srl** cul contribût de **ARLeF** - che al esplore il significât dal jessi artiscj zovins in lenghe minoritarie; sul **canâl radiofonic**, invece, e cjatarà spazi la leture cuotidiane di "**Lis predicjîs dal muini**", opare di un dai prosatôrs furlans plui grancj, pre Josef Marchet (1902-1966), par cure de **Societât Filologjiche Furlane**.

La programazion e je stade ilustrade dilunc di une conference stampe, li che a son intervignûts l'assessôr aes Autonomiis locâls, Pierpaolo Roberti; il President de ARLeF, Eros Cisilino; il diretôr RAI Fvg, Guido Corso e la prime responsabile dai programs in lenghe taliane RAI Fvg, Gioia Meloni; il President de Societât Filologjiche Furlane, Federico Vicario e il regjist dal progjet, Dorino Minigutti di Agherose.

«La ARLeF di simpri e colabore cu la Rai pe valorizazion de lenghe furlane – al sclaris il president de Agenzie, Eros Cisilino -. Cence dubi, cun chescj doi gnûfs inseriments intai palinsestj si va inte direzion juste e si metin insiem modernitât e storie; artiscj zovins che si esprimin cun e intal ambient furlan inte proprie lenghe, e un toc significatîf di culture e croniche di costum dal Friûl cui intervents acuarts di pre Marchet, inteletuâl furlanist inmagant e autonomist».

"Al è motîf di sodisfazion, e di conferme de mission dal servizi public radiotelevisîf, podê inricjî la ufierte dai palinsestj de sede Rai regionâl cun prodots sugjerîts dal teritori – al rimarche il diretôr di RAI Fvg, Guido Corso -. E lu è ancjemò di plui cuant che a son il risultât di une sinergjie cu lis istituzions e lis realtâts culturâls che a operin, tant che la ARLeF e la Societât Filologjiche Furlane, intune otiche dal "fâ squadre", come za sperimentât in altris stagjons. Cheste volte, inte aromai consolidade e tant preseade programazion in lenghe furlane, a cjatin spazi pe tierce volte i documentaris INT/ART - fats di Agherose - e la leture di une selezion di "Predicjîs" gjavadis dal volum di pre Josef Marchet".

"Pre Josef Marchet, leterât, studiôs, scritôr, ricercjadôr e docent dal prin cors di formazion par insegnants organizât intai agns '40 de Filologjiche. "Lis predicjîs dal muini" a son un classic de leterature furlane dal secont Nûfcent - al declare Federico Vicario, President de Societât Filologjiche Furlane -, un esempi par chei che si impegnin inte scritture in marilenghe; a rapresentin une dimension di valorizazion stant che il furlan al è, prime di dut, emozion e sintiment."

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**

Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<

